

## I “SIGNORI DEI PIANI SUPERIORI”

*Siôr Diretôr,*

*la cjarte, si sa, ‘a si lasse scrivi e pastrocjâ, cemût ch’al à fat Fidri dai Ros, tal ultin numar dal sfuei che tu direzis, in t’un articul indulà - e no è la prime volte che lu fâs – al pand l’uniche preocupazion di imbastî, cun t’un fervôr den di une miôr cause, un cjsjel di petez sul Moviment Friûl.*

*Paraltri, al’è clâr che conche cui ch’al scrîf - e che partant si riten gjornalist – ‘a nol dopre la “deontologje professionâl” (e, in primis, la verifiche de notizie ch’a si ûl dâ), al’è clâr ch’al smieje a alc di diviers di chel di informâ cun coreteze.*

*Vignin ai fats. Il Siôr in cuistion al dîs che il grop ladin furlan, par cause me, al’a scugnût stâ a cjalâ (no si sa ce), parvie ch’o vares dite a chei da Lia Romontscha che culî ‘a no son bez, cence vei prime interpelât altris fuarcis.*

*Ore, a part che no crôt di vei un tâl podê (no erino, i rapresentants di Onde Furlane, in Suissare?) ‘o dîs che chel ch’al scrîf Fidri ‘a nol’è vêr, prime, parceche no ài fevelât di chestis robis, cun Fidri, secont, parceche no ài vût nissun rapuart cun la Lia Romontscha, su cheste cuistion.*

*Tant l’è vêr che, plui indenani, tal so articul Fidri al dîs che la Lia ‘e veve invidât (e pajât) uficialmentri i rapresentants de Filologjche e da Union dai Scritors furlans (che par Fidri ‘a no esist forsît parceche lui nond’i fâs part), e no il Moviment Friûl.*

*Ju amîs dal MF ch’a son lats vie, è son lâts parceche ju veve invidats un lôr amî ch’al sta in Suissare. A chest proposit ‘o ài di disî che non son rivâts a ore di gusta (cemût che, cun tante finezze, si dîs sot da fotografie), ma as sîs di sere, e che àn gustât, come i doi rapresentants di Onde Furlane, a lôr spesis.*

*Si chest al ûl disî informâ!*

*Al’è clâr, par me, che dut l’articul di Fidri al’è imbastît par un fin che no si po – s’a si è umign’ ch’a cirin, prime di dut, la veretât - acetâ.*

*Al’è cun marum ch’o ti scrîf, parceche ‘a mi displâs che tu e Fidri – ch’o diseis di batisi pe cause furlane - si compuartais in cheste maniere.*

*Nol’è disigûr cun lis bausis è cun lis provocazions ch’a si risolvîn i nestrîs problemas.*

*Mi domandi ancje si l’oservazion di Fidri – “bisugne lassâ da bande nostalgjis e individualisins - no vadi propit cuintri cu le à fate.*

*Probabilmentri - no sai si cun cussienze o in buine fede - la int che scrîf ciartis robis ‘e lavore, di fat, no a pro de cause furlane (che in tiarmins economics, no rind), ma, di fat, propit a pro di chei ch’a son cuintri.*

*Par chel ch’a mi rivuarde, ‘o crôt di vei cirût di fâ alc pal bimilenari da int ladine, culî in Friûl. ‘O ài cjapât contats - ‘o ripet - no cun la Lia Romontscha, ma cun la provincie di Bolzan, parvie ch’o eri a cognossince de iniziative ch’a vevin inmaneât. Cussì, mi soi cjatât cun l’assessor ladin di Bolzan (a mes spesis) dr. Hugo Valentin. ‘O ài scrîts diviars articui su gjornai locali (e tai mandî, ancje si ‘o pensi che seipi tu che Fidri ju veipis lez), indulà ch’o ài ancje tabajât di ce che al’è fat il MF.*

*‘O ài presentât tal cumun di Udin une mozion (e la stesse robe ‘e àn fat i nestrîs conseîrs cumunai), e tal cumun di Pinzan si è fate une manifestazion, cemût che cumò ‘a si fasarà a Pozui e te basse furlane.*

*Nol'è tant, ma al'è simpri alc. Ju unics ch'a somein disinformats di chest 'a son propit chei ch'a vuelin scrivi su chestis cuistions. Pazienze!*

*Cert, si chest lavôr lu vessin fat par certe int, al sares stât cetant miôr stà a cjase. Par furtune ch'a esistin ancjemò tanc' furlans che no son condizionâts di cui che ur dà lavôr o finanziaments, e al'è par lôr che, ancje cui nestrîs limiz, 'o continuarin a lavorâ.*

*Mandi.*

*Roberto Iacovissi*

No vares mai pensât che un cuatri riis di Fidri dai Ros a fasessin dismontâ jù dal Olinpo adiriture il pressident dal Mf, cun tune mancjance di sens politic e de veretât e des proporziions veramentri uniche.

Fidri al veve scrit che “il grop plui grant dal mont ladin, il furlan, al à podût dome stâ a cjalâ parceche un esponent dal MF, Iacovissi, ur à rispuindût che chî nond'ere nè bêz nè personâl nè nuje. Pecjât, parceche al vares podût amancul interpelâ âtris fuarcis prime di cjapâsi la responsabilitât di strassâ une ocasion di chê fate”. E nol è il câs di ritratâ nuje, parceche i contaz cul dr. Hugo Valentin (o vin la documentazion), a son lâz propit cussì. E ancje la robe e jè lade strucje. Pensistu che un partît al puedi tignîsi in bon par “diviars articui” (jo an cognos tre) scriz su gjornâi locâi? Chi propit si piert dut, fûr che la solite liende di lamentâsi e di contâ bausiis dant la colpe a di cheâtris parceche vuâtris “dei piani superiori” (l'espression e jè dal vuestri segretari De Agostini) no rivais o no voleis fâ nuje.

Bausie e jè che Fidri us tachi par sisteme. E jè la prime volte ch'al fevele di MF sul gno gjornâl. Bausie e jè che la manifestazion dal comun di Pinçan e ché de Basse furlane e seti robe vuestre. Si sa trop che àn stentât chêi brâs zovins par podê meti, sot des lôr fadiis, la “sponsorisazion” dal partît.

Parceche vuâtris tre o cuatri dal Palaçut o veis il brut vissi di no dî nuje e di no fâ nuje. Però no pierdeis ocasion par riclamâsi a ereditâz storichis e a responsabilitâz tai confronz dal Friûl. Tune peraule, il Friûl o seis vuâtris, ancje se chêi ch'a lavorin e ch'a votin lu fasin plui par disperazion che âtri e parceche a crodin tune cause furlane ma no in vuâtris. Cui us cognossial? Cui sajal, in Friûl, cui ch'al è il pressident, il vice-president, il segretari?

Tant plui che si dais la volte, come tal pindul-pandul.

Chest noi ûl dî che la idee no sei buine e che la “base” no sei sane. O seis vuâtris che no funzionais. Parceche o faseis un manifest par une peraule (no savevistu che “Rivâ a ore di gustâ” al è un mût di dî? O esal ancje un mût di fâ?) e o taseis là ch'al sares di fâ il manifest.

O lais disint che no veis bêz par fâ un gjornâl. E nô ce bêz vino? E chêi di Onde Furlane? E cheâtris? O tirais pûr i bêz de regjon e magari ancje di âtris bandis, par vôi che no ju veis sudâz? O veis pûr rivâz a fâ il gjornâl par dispiet e sot votaziions? O lais disint che no veis int che scrîf. Al veve pûr dite za tinp, il vuestri segretari che, par 50.000 francs al cjatave a Udin duc' i cjocs ch'al voleve par butâ jù un articul par furlan?

Te iniziative des firmis pe Regjon autonome o veis stât a cjalâ; ta chês âtris, o veis dade “la vuestre adesion” (potense de ufficialitât e dai tinbros!).

Cumò o veis fate chê dai puescj di vore, sacrosante; dome che tocje jessi indivinins par savê dulà lâ a firmâ.

In cheste clime, no veis di dâsi di maravee se la int us scjanpe a pleton e a torne a votâ int di âtris partîz ch'a fasin plui di vuâtris. Amancul si sa ce ghigne che àn e il colôr des lôr moschetis.

A Passarian si à viodude, te int, tante gole di cjatâsi, di dâsi dongje, di fâ alc come ch'a fasin in Sardegne e in Valdoste e in Tirol. Ancje culi si brame l'autonomie, ma al è il partît ch'al è cence cjâf e cence tamon. E jè vere che la spice no jè dut, ma tal câs dal MF no jè nuje. E a dà danp.

Alore, s'ò voleis veramentri ben al Friûl, come ch'ò lais disint, scomencait cul dimetisi, cul tirasi in bande. La int, chê che no jè dismoralisade dal dut, e rivarâ a cjatâ fûr une sô strade, magari difarent. E senò amen. Sinpri miei murî cun dignitât che no tirale a lunc in coma, fasint pene vuâtris e fasint penâ cheâtris.

Par chel che nus riguarde nô, Jacovis, “se chest lavôr lu vessin fat par certe int, al sares stât cetant miôr stâ a cjase. Par furtune ch'a esistin ancjemò tanc' furlans che no son condizionâts di cui che ur dà lavôr o finanziamentz, e al è par lôr che, ancje cui nestris limiz, ‘o continuarin a lavorâ”. Al vâl ancje par vuâtris che “la cjarte, si sa, ‘a si lasse scrivi e pastrocjâ”. A son i faz che si stente a dineâju. Mandi.

Novembar 1985

Antoni Beline